

Հ Ա Շ Վ Ե Տ Վ ՈՒ Թ Յ ՈՒ Ն

2023 թվականի հունիսի 21-ից 26-ը

Բելգիայի Թագավորություն (ք. Բրյուսել) գործուղման արդյունքների մասին

1. Անունը, ազգանունը, զբաղեցրած պաշտոնը՝

Ռուստամ Բադասյան՝ ՀՀ պետական եկամուտների կոմիտեի նախագահ

2. Գործուղման վայրը և ժամկետները՝

Բելգիայի Թագավորություն, ք. Բրյուսել, 2023թ. հունիսի 21-ից 26-ը

3. Հրավիրող կողմը՝

Համաշխարհային մաքսային կազմակերպություն

4. Գործուղման նպատակը (աշխատանքային ո՞ր խնդրի լուծման համար էր նախատեսված գործուղումը)՝

Յուրաքանչյուր տարի անց են կացվում Համաշխարհային մաքսային կազմակերպության (այսուհետ՝ ՀՄԿ) Խորհրդի նստաշրջաններ, որոնց ընթացքում քննարկվում են ՀՄԿ Խորհրդի կողմից հաստատման ենթակա ՀՄԿ կոմիտեների, ենթակոմիտեների, հանձնաժողովների տարեկան հաշվետվությունները, այդ թվում՝ մաքսային գործի ոլորտում նոր մշակված կամ փոփոխված գործիքներն ու ստանդարտները:

Մասնակցությունը ՀՄԿ Խորհրդի նիստերին նպատակ ունի ապահովել Հայաստանի Հանրապետության ներգրավվածությունը մաքսային կարգավորման և միջազգային մաքսային հարաբերությունների զարգացմանը, ինչպես նաև դրանց վերաբերյալ Հայաստանի Հանրապետության մաքսային մարմնի դիրքորոշման ներկայացումը:

5. Քննարկված թեմաները՝

Նշված նստաշրջանների ընթացքում քննարկվել են հաշվետու ժամանակահատվածի ընթացքում կարողությունների զարգացման, այդ թվում՝ առցանց ուսուցման, բարեվարքության, գենդերային հավասարության և այլ ոլորտներում ՀՄԿ կատարած աշխատանքները, ապրանքների դասակարգման,

մաքսային արժեքի և ապրանքների ծագման ոլորտներում մշակված նոր գործիքները և ստանդարտները, ինչպես նաև էլեկտրոնային առևտրի, տվյալների ռազմավարության, Առևտրի համաշխարհային կազմակերպության առևտրի դյուրինացման համաձայնագրի, ապրանքների բացթողման ժամանակահատվածի, հետբացթողումային հսկողության ոլորտի, ապօրինի առևտրաշրջանառության կանխման ուղղությամբ, ռիսկերի կառավարման կոմպենդիումի վերանայման և այլ աշխատանքներ: Քննարկվել են նաև ՀՄԿ ռազմավարության 2022-2023թթ. կատարողականը, գալիք հաշվետու տարվա ռազմավարական ծրագրերն ու առաջնահերթությունները, ինչպես նաև Քաղաքականության, Ֆինանսական և Աուդիտի կոմիտեների տարեկան զեկույցները:

6. Հանդիպումները, ելույթները, բարձրացված կամ քննարկված հարցերը՝

Նստաշրջանների ընթացքում ՀՄԿ անդամ պետությունների պատվիրակությունները, այդ թվում՝ ՀՀ պատվիրակությունը, ներկայացրել են իրենց դիրքորոշումը ՀՄԿ Խորհրդի հաստատմանը ներկայացված փաստաթղթերի մասին, ինչպես նաև ՀՄԿ զարգացման ուղղություններին համահունչ՝ յուրաքանչյուր անդամ պետությունում իրականացվող աշխատանքների մասին տեղեկատվություն:

Նստաշրջանների ընթացքում հանդես եմ եկել ելույթներով, որոնց ընթացքում ընդգծվել է ՀՄԿ-ի կողմից մշակված գործիքների ու ստանդարտների կարևորությունը՝ մաքսային համակարգի զարգացման հիմնական ուղղությունները նախանշելու առումով՝ այդ համատեքստում ներկայացնելով նաև ՀՀ մաքսային համակարգում ՀՄԿ զարգացման ուղղություններին համահունչ իրականացվող աշխատանքները:

Ներկայացվել են նաև Սահմանների համալիր կառավարման ուղղությամբ ՀՀ մաքսային համակարգի ձեռքբերումները, այդ թվում՝ թույլատվական փաստաթղթերի տրամադրման ամբողջությամբ թվայնացված համակարգ ներդնելու ուղղությամբ:

Միևնույն ժամանակ, Խորհրդի աշխատանքներին զուգահեռ կայացել են նաև երկկողմ հանդիպումներ ԱՄՆ մաքսային և սահմանային պաշտպանության գործակալության (CBP) ղեկավարի տեղակալի, Հնդկաստանի կառավարության անուղղակի հարկերի և մաքսերի կենտրոնական խորհրդի նախագահի, ինչպես նաև

Ճապոնիայի ֆինանսների նախարարության Մաքսային և սակագնային բյուրոյի գլխավոր տնօրենի հետ:

7. Հանդիպման կամ հավաքի ժամանակ ընդունված որոշումները, պայմանավորվածությունները, ստորագրված փաստաթղթերը՝

ՀՄԿ Խորհուրդը նստաշրջանների ընթացքում հաստատել է Կարողությունների զարգացման կոմիտեի, Բարեվարքության ենթակոմիտեի, Ապրանքների դասակարգման, ծագման և մաքսային արժեքի որոշման կոմիտեի, ինչպես նաև Մշտական տեխնիկական ու Իրավակիրարկման կոմիտեի տարեկան հաշվետվությունները, ՀՄԿ 2023-24թթ. ռազմավարության առաջնահերթությունները, Քաղաքականության հանձնաժողովի, Ֆինանսական ու Աուդիտի կոմիտեի հաշվետվությունները, ինչպես նաև գալիք ֆինանսական տարվա հանդիպումների ժամանակացույցը: Խորհրդի այս նստաշրջանների ընթացքում ընտրվել են նաև Խորհրդի համանախագահող, տարածաշրջանային տեղակալներ, ինչպես նաև նոր գլխավոր քարտուղար, հաստատվել կամ ընտրվել են նաև Ֆինանսական, Աուդիտի կոմիտեի նախագահներ, տեղակալներ, կոմիտեի անդամներ, ինչպես նաև Քաղաքականության կոմիտեի անդամներ:

Հնդկաստանի կառավարության անուղղակի հարկերի և մաքսերի կենտրոնական խորհրդի նախագահի հետ ստորագրվել է Հայաստանի Հանրապետության կառավարության և Հնդկաստանի Հանրապետության կառավարության միջև մաքսային հարցերով համագործակցության և փոխադարձ օգնության մասին համաձայնագիր, որով հիմքեր են ստեղծվում կողմերի միջև մաքսային բնագավառում փոխգործակցության հնարավորությունների ընդլայնման և ամրապնդման համար:

8. Առաջարկությունները, դրանց ընթացք տալու վերաբերյալ առաջարկները՝ եղանակը, ձևը, ժամկետները, պատասխանատուները, ակնկալվող արդյունքները՝

Նստաշրջաններին մասնակցությունը հնարավորություն է տվել ծանոթանալ համաշխարհային մակարդակում մաքսային գործի ոլորտի գլոբալ զարգացումներին, ՀՄԿ կողմից առաջարկվող նոր գործիքներին ու ստանդարտներին, ինչպես նաև առանձին անդամ պետություններում առևտրի պարզեցմանը, ապօրինի առևտրաշրջանառության կանխմանն ուղղված քայլերին: Ձեռք բերված

տեղեկատվությունը ՀՀ մաքսային ծառայության կողմից կօգտագործվի մաքսային բարեփոխումների շրջանակում, այդ թվում՝ մաքսային քաղաքականության ու վարչարարության առաջիկա 5 տարիների ռազմավարության մշակման նպատակով: Միաժամանակ, ՀՄԿ-ի հետ համագործակցության շրջանակները, այդ թվում՝ ընթացիկ կոմիտեներին, ենթակոմիտեներին, հանձնաժողովների աշխատանքներին ներգրավվածության մակարդակն էապես կընդլայնվի, իսկ նստաշրջանների ընթացքում ձեռք բերված երկկողմ պայմանավորվածությունների արդյունքներով կիրականացվեն շարունակական աշխատանքներ, այդ թվում՝ երկկողմ համաձայնագրերի կնքման ու տեղեկատվության (փորձի) փոխանակման շրջանակներում:

9. Ստորագրությունը, ամսաթիվը



28.06.2023թ.